

TE HEHEURAA API

I neia i te piha neneiraa Univereti i Roto Miti i Utah no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa.

Nu. 4

Epelera, 1918

Mat. 12

Inaha hoi, te fatupu ra te Fatu i te taata no roto i to ratou iho nunaa e to ratou iho re'o i te mau fenua atoa, ia haapii i ta'na parau; oia ia, o te mau mea atoa ta'na e mana'o i roto i to'na paari, o te au ia ratou; e no reira i te ai tatou e, te feruri ra te Fatu ma te paari i te au i ta te parau-tia e te parau mau.—Alama 29:8.

TÔ TATOU MAU FAEHAU.

Roto Miti i te 6 no Epelera, 1918.

Na te Feia Mo'a e te mau taata atoa hoi i te mau Fenua Moana. Ia ora na outou atoa i te aroha rahi o to tatou Fatu, Amene.

I te 30 no Mati e i te 1 no Eperela i farerei ai matou i te hoê oaoa rahi roa oia hoi ua farerei ai matou i te tahi o to tatou mau tamarii Tahiti o tei faaho'i hia mai Farani mai. E oia mau atura e farereiraa oaoa mau te reira; mai tera hoi te huru o to matou farereiraa; I te 30 no Mati i tae mai ai ia Farani Fulumare te hoê parau taniuniu e faai-te mai e e te tere mai nei na nia i te pereoo auahi te tahi pupu faehau Farani e mau taata hoi ratou no Tahiti mai e e mauruuru hoi ratou e farerei mai ia'na e e paraparau hoi. Na Tihare a Perry taua parau taniuniu i haapono mai.



Mauruuru roa o Farani ia farerei oia i taua parau taniuniu e ua paraparau taniuniu tia'tu oia i te mau Orometua tahito o tei ite i te re'o Tahiti e o tei faahoia mai ma te faaite atu ia ratou e haaputuputu mai nei ratou e farerei mai i te mau taata no Tahiti mai. Ua tae atu taua parau ra ia Tihoni, Tanona, e ia Toma Vutupere, e ia Hebera, e ia Taratone e ia Taranata, e ia Etera e ia Tila e ia Heneri e ia Farani hoi. E ua tae ana'e mai taua mau Orometua i te farereiraa i taua mau hoa no matou. Apoo atura te mau orometua ma te imi i te ravea i te haapao to matou mau hoa manihini; ua maitihia atura o Farani Fulumare e o Taratone i te haere atu i te tahi oire e 50 maile i te atea e farerei ai i to matou mau hoa e e faaratai mai ia ratou i te oire Roto Miti. Te toea o te mau Orometua ua parahi ia i te oire ma te iimi i te mau ravea e faataamaa e e faataoto ai to tatou mau hoa e i te imi hoi i te ravea e faaite atu i te huru o te Oire ia tae ananahi.

Haere atura Farani e o Taratone i te Oire Provo ei reira farerei ai raua i to tatou mau hoa, e farereiraa mau te reira, e haamana'o o Farani ma i taua farereiraa ra e tae noa'tu i to raua poheraa; no te rahi o to Farani parapuraa ua piri to'na arapoa.

Ua po roa ia tae mai te pereoo auahi i te oire Roto Miti, aita râ te taata i varea i te taoto, ia tapae mai te pereoo ei reira hoi te mau orometua e to ratou mau vahine e te mau hoa e raverahi e te mau metua o te tahi o te mau orometua te parahi i Tahiti i teie nei; ua hinaaro ana'e ratou e farerei e e faatura hoi i to tatou mau hoa no te tama'i mai. I reira atoa te tahi no te Sotaiete Red Cross (Tatauro Uteute) ua ani mai nei ratou e tauturu atoa mai i te haapao i te mau faehau, e ua faatia mai te mau Orometua.

Ua faataotohia to tatou mau hoa i roto i te tahi fare tapaeraa ra e i te poipoi ua faataamaahia.

Ua tarahu te mau orometua i te tahi na pereoo uira

rarahi roa e ia poipoi ua tii mai nei ratou i te mau manahini e ua haere mataitai haere i te mau vahi roo maitai o te oire. Ua haere na te mau purumu nehenehe e na te Fare Hau e ua haere roa'tu i te pa (fortification) ei reira hoi e 13000 faehau Amarika, ei reira atoa hoi i te fare auri e te tapearaa enemi, e 1500 e te tiahapa taata Purutia i roto i taua tapearaa ra. Ia oti te mataitairaa ei reira ua haere ana'e matou i te Fare Minemine i pihai iho i te hiero e ua haapaohia te tahi pureraa no te mau faehau Farane, e ua faataihia te hamonia rahi, ua haapaohia te tahi a'oraa evanelia i roto i te re'o Baretane e i muri mai na Farani Fulumare i a'o mai i roto i te re'o Tahiti i te hoê parau maitai rahi e te taamahanahanaraa aau. Ua rahi hoi te roimata tei tahe mai i taua pureraa ra.

Ia oti te pureraa ua putuputu mai to tatou mau hoa i pihai iho i te hamonia rahi e na te taata faatai hamonia i faafaite mai ia ratou i te huru o taua mea ra. Te tahi mau re'o o taua hamonia e au ia i te patiri, e te tahi mai te hoê manu iti nainai.

Ua haere matou i rapae au i te Fare Minemine e ua mataitai i te mahora o te Hiero e ua hamanihia hoi to matou hoho'a. E riro ia e neneihia taua hoho'a i roto ia Heheuraa Api.

Ia fatata i te hora no te revaraa o te pereoo auahi ua haere ana'e matou i te hoê mahora matie e te marumaru maitai ei reira ua taamaa ai e ua himene matou i te mau himene Tahiti. Ia tae mau te hora revaraa ua himene matou te himene; "Ei tatou i teie nei i to tatou nei taa ê raa" ei reira ua reva'tu to tatou mau hoa. Ia vai te aroha o te Fatu i nia ia ratou e ia paruru mai Oia ia ratou i to ratou tere o te pure ia o to ratou mau hoa tahito. Papaihia e Hebera Tefera.

UA TAE TE MAU FAEHOU TAMARII TAHITI I
TE OIRE I ROTO MITI I UTAHA.

Parau Faaite teie i te huru o to matou, to te mau faehou tamarii Tahiti, farii-raa-hia mai i te oire rahi e te nehenehe i te fenua ra i Amarika, o Roto Miti ia, te pu rahi no te Ekalesia Moromona.

Ua faaroo pinepine matou i te i'oa o te oire ra, o Roto Miti, e te nehenehe to reira a parahi ai matou i to matou fenua a'ia i Tahiti, aita râ i mana'ohia e parau mau te reira parau, e ua faaroo atoa matou e, e feia roo ino to te Moromona ra, e ua fariihia e matou nei i taua parau no to ratou roo ino a parahi ai matou i Tahiti. I teie nei râ e ore roa e nehenehe ia matou i te mau faehou tamarii Tahiti, ia faaau i to matou manruuru ma te popou rahi i to matou mau aau, no te hamani maitai mai ia matou i to matou taeraa i roto i te oire i Roto Miti i Utaha ra. E taua roo ino ta matou i faaroo tei parauhia i nia i te Moromona, e ere ia te parau mau. Ua ite râ matou e, e feia roo maitai rahi e te aroha mau. Te mau parau ino tei parauhia i nia i te Moromona aore roa matou i ite i te reira i Roto Miti, ua ite râ matou i te mau mea maitatai ana'e.

E maha ahuru e ma piti faehou tamarii Tahiti matou o tei tae i Roto Miti. A parahi noa ai matou i roto i te pereoo auahi, ite ihora matou na orometua toopiti i te haereraa mai e farerei ia matou, o Farani Fumela raua Caratone ia. I te reira taima ihora, pii maira raua ia matou e; Ia ora na outou e te mau aito rahi no Tahiti e. I reira, putapu ihora to matou mau mafatu i te oaoa ma te popou rahi i te faaroora i te hoê re'o no to matou fenua hui tupuna ra. Parau faahou maira raua, e homa e te tumu maua i tae mai ai i rotopu ia outou na e, e haere mai ia tii ia outou ia haere

tatou atoa i roto i to matou oire tei parauhia Roto Miti. Tupu i hora to matou mauruuru i taua tapao aroha ia matou. E inaha tae atura matou i taua oire rahi ra, pou atura matou i raro, faaarataihia atura matou i nia i te pereoo uira i te hoê fare tapaeraa o tei parauhia ra Hotela Perry. E i te hora iva ia i te pô i taua taime ra, haere atura te mau faehau e hopu i te pape mahanahana au maitai. E i muri iho ra tupu i te vareî tatao, haere atura matou e taoto ai i roto i te mau roi maru maitai e te nehenehe hoi. E no te rahi hoi i te maitai i te mau roi aore te hoê pae o matou i ara i te hora ono i te poipoi, ua taoto noa ra e tae noa'tura i te hora vau. No te maoro o to ratou taоторaa i taua poipoi ra haere atura matou e faaara ia ratou ra i te mea e, te mana'o ra matou e ua pohe ratou, pahono maira te tahi pae e, aita matou i pohe, ua mana'o râ matou e tei roto matou i te ata, i te mea e a piti a'enei matahiti e hitu avae i te moe raa te roi mai te reira te maitai, e aita paha e itea-faahou-hia i te reira huru.

Faanehenehe i hora te mau faehau no te haere e tamaa i te hora iva i te poipoi, i reira tae maira te mau orometua, ui maira ratou e ua nehenhe anei outou, parau atura matou, E, ua nehenhe roa matou, parau maira ratou ia matou, a pee mai ia matou, arataihia atura matou i roto i te hoê fare tamaaraa rahi. Ua tamaa maitai matou e paea atura. I te hora ahuru tae maira te mau pereoo uira e tii mai ia matou, afaihia'tura matou e haamataitai i roto i te oire taatoa o taua fenna ra. E oire nehenehe mau i Roto Miti. Ua ite mata matou i taua hiero rahi e te nehenehe, aita râ matou i tae i roto. E mea aano roa te mau purumu pereoo e te mau fare i reira e mea nehenehe ana'e. E tae i te hora hoê ahuru e ma piti, haere atura matou atoa i roto i te fare pureraa menemene no te Moromona i Roto Miti mataitai ai i te hoê haramonia rahi to roto ra. Ua maere rahi matou atoa i te navenaveraa i te faataeraa i taua haramonia rahi ra. Te vai

mau nei te hoê ravea i roto i taua haramonia ra ia faataehia e au tia mau ia i te re'o taata. Te tia ra matou i te tahi hopea o taua fare menemene ra, e te haamairihia ra i raro te hoê pine i te tahi hopea, e inaha, ua faaroohia e matou i te pinairaa o taua pine ra. Ua maere matou i te reira i te mea e, e ere ia te pinairaa rahi te mairiraa te pine i raro, e mea roa roa atoa taua fare menemene ra. E mai i reira haere atura matou i roto i te hoê aua rahi, mai te mea ra e, e ururaa ia, o tei parauhia e, "Park," i reira tamaa faahou matou e paea roa atura, i muri a'era himene noa'tura matou i te mau himene no te a'ia. Haere atura te tahi tau orometua e tii i te anani e te apara, afai maira, ei reira parau maira ratou ia matou e, teie maa, na outou ia ei tamaaraa i nia i te pereoo auahi.

E tae i te hora piti arataihia'tura matou i nia i te pereoo auahi, i te reira taima ihora parau maira ratou ia matou e, aue i te mauruuru rahi e, i te farereiraa ia outou; pahono atura matou ia ratou ra e, o tatou atoa o tei mauruuru, aita râ matou i ite e nahea ta matou mau haamauruururaa'tu ia outou na no ta outou mau hamani maitai faito ore ia matou, no reira te mauui nei te aau i te taa-ê-raa ia outou na. Atira noa'tu ra tei te Atua ia te tia.

A tere atu ai matou na nia te pereoo auahi mai Roto Miti atu i San Francisco, feruri ihora matou i te mau mea nehenehe e te maitai rahi i iteahia e matou i roto i taua oire pu rahi no te feia hamani maitai ia matou oia hoi to Roto Miti.

Mai i reira e tae noa i teie nei â mahana aita i ore i te haamana'oraa i to matou taeraa i te oire i Roto Miti i te fenua ra i Utaha.

E mea tia ia matau ia paran atu e, Aue Roto Miti rahi, e te roo maitai no te Moromona ta matou i farerei e.

Papahia teie nei parau e te mau faehau tamarii Tahiti.

Te Parau Niuniu.

Ua pohe roa te tavana Purutia no Ukrania (Rutia) i te hoê topita.

Ua peapea roa to Purutia no te taparahiraa te Rutia i te tavana Purutia no Ukrania. E eita ore o Purutia te enemi faahou e o Rutia no te au ore o te Ukrania e no te vavahi i te mau e'a turu e te pereoo auahi e no te ati o te Purutia i te Rutia faaapu i Kieu.

Te faaite maira te Baratane e ua au noa te paari e te etaeta o te Amarika i roto i te aroraa, i te hoê niu ofai o tei riro ei ati ri'ari'a roa no Purutia.

I muri a'e i te hoê pupuhiraa fenua e rave rahi na hora e ua faaû tino te Baratane e te Farani i te enemi i te pae Anahoa i Amiens e ua manuia te vahi tei opuahia, e 3 maire te hohonuraa o te vahi i terehia i roto roa mai i te reni o te Purutia, 100 pâ auri tahuiraa to te Hau Amui i roto i taua faaûraa ra, e ua roaa ia ratou e 7000 mauauri, e 100 pupuhi fenua Purutia, ma te haru hoi i na mataeinaa e rave rahi.

Ua parau mai tenerara Amarika ra, o March, e ineine na faehau Amarika e 500,000 e opua'i o Foch i te hoê aroraa rahi faaito ore no te faaoti-oioi-raa i te tama'i.

I roto i te aroraa i Picardie ana'e, e 37,000 Purutia, oia atoa na Raatira faehau e 1000, e na pupuhi fenua e 500 i roaa mai i te Hau Amui i roto i na mahana e toru.

No te ite te Tenerara Purutia ra o Van Hunter i to ratou ati fatata, ua horo oia e to'na nuu ma te faarue mai i te mau pupuhi fenua rarahi, e haapueraa rahi ofai pupuhi e te tahi atu mau ohipa tama'i.



(Tuatiraa)

Tera mai te mau io'a o te matou mau hoa faehau :

Fr. Sargent Moritaroy	Peltzer Edmond
Langomazino Maurice	Burn s Mounuhu
Papuraa Tevahitaa	Georges Tama a Tama
Teraimana Oropeti	Durietz Francois
Mehirai Peni	Mercier Hoitoofa
Tainuano Maono	Terina a Tutea
Ravaki David	Johan Kiharau Wilber
Emile Tinan	Arnand Louis
Arunui a Tumahai	Perry Georges
Aporo Bonnet Aguste	Hunta Terai
Louis Juventin	Tehuitua Louis
Tetuaiteahu a Tau	Terii Taniroi
Tane Puairau	Veri Albert
Drollet Amatole	Teona Tahito
Brander Terii	Matanao Taupua
LeCaill Jean	Temaui Teihoarii
Alfred Teriierooiterai	Tuana
Emile Trollemberger	Charles Perry
Joseph Jamet	Tramitai Fiu
Tori Blanchard	Rota Fareura
Tapi Tehoa	Dit Duirot

Tei roto i te oire rahi ra i New York te hoê vahine o te taoto noa i e toru ahuru e ma piti o te matahiti ei reira ua ara mai. Ua itea pinepine te tahi mau taata o te taoto noa te tahi na matahiti rii ei reira ua ara mai. Aita râ i itea te taata o te taoto noa e 32 o te matahiti ei reira ua ara mai. E riro paha ua ara rii mai e amu i te maa ei reira ua taoto faahou â. E vahine Suede oia.

RAVEA API NO TE FAAAPURAA TO.

E ohipa tumu ia te taviriraa tō i te fenua Havaii, E ti-hota uouo maitai roa tei hamanihia, e rave rahi te tausani-raa i te tane i te matahiti hoê. Ua faautahia i Amerika i nia i te mau pahi rarahi e hoohia i reira. Ua riro ia ei ohipa faufaa rahi i to Havaii. E no reira te haapao-maitai-hia ra te mau faaapuraa tō e ua imihia te mau ravea'toa e au-perupe ai te mau faaapu e e rahi roa'i te auhune. Ua ahoa-ho te aau o te mau Fatu faapu i te mea te tupu oioi ra te aihere huru rau i roto i te mau faaapu e faaapiapi roa'i i te ohi tō. E moni rahi hoi tei pau i te utarutaru-pinepine-raa i te repo ia ore te aihere ia tupu. E rave rahi te mau ravea i imihia ei faaore i te tupuraa te aihere.

E taime maoro râ aita i manaa i te mau aravihi i tiaoro-hia e imi i te ravea faaore. I teie nei râ, ua pu te aea, ua manuia te imiraa e ua itea te tahi ravea e ore ai te aihere e tupu e e hau atoa'tu ai te tō i te ruperupe.

Tera ia te peu faaapuraa api. Hou te ohi tō e oteo mai e hohorahia te pepa, (parau) hoê iati te aano i paraihia i te tahi huru pene ereere, (asphalt) i nia'e i te repo i te vahi e otea mai ai te ohi tō ra, a haamauhia'i i raro ma te tahi maa repo mārō i tuuhia na te hiti o te pepa ia ore ia ahehe e ia hanti i te mata'i, No te etaeta e te ooi hoi o te omou ohi tō ra ia otea maira e patiahia te pepa e e tupu ruperupe te tō i nia'e, e no te paruparuraa e te mārûraa hoi o te ohi aihere e tapeahia ia i raro a'e i te pepa e oriorio e e pohe roa i te mata'i ore e te tamaruraa. Ia tae i te auhune ua mau-ruuru roa te mau fatu fenua i te mea i hau ê atu te auhune 10 tane tō i te akera hoê i tei mutaa ihora. Te moni hoi i pau i te hooraa e te hohoraraa i te pepa e afa noa iho ia no te moni i pau i mutaa ihora i te utarutaruraa i te repo ia ore te aihere ia tupu, e toe mai te tahi afa no te afata vairaa.

E huru maoro te imiraa ua itea hoi te ravea e hamani i te pepa au maitai ei faaoreraraa aihere na roto mai i te ota tumu to mārō ia oti te tavirivaahia ra.

Ua tano maitai te parau ra e, "E imi, e itea ia."

E FAAARARAA.

Eaha te tahi parau e au ia parau-hua-hia i te feia e parahi i te mau fenua moana?

Tena na ia. A tanu i te haari, a tanu i te pipi, a tanu i te umara e te taro, te mea, te uru, te fei e te mau huru maa maohi maitatai roa ra, e ia rahi roa'tu â hoi te tanu-raa. A faarahi hoi i te nana puaamaohi e te moa. No te ahara? No te mea ua iritihia te rahi o te mau tane no roto mai i te mau faaapuraa i Farane, i Beritane, e Italia ma, e i teie nei i Amerika hoi, a tuuhia'tu ai i roto i te mau nuu tama'i ei faaore i to te Purutia hinaaro e faatîti i to te ao atoa nei. E no reira aita i navai te maa i te reira mau fenua. Te haponu atu nei to Amerika i te faraoa e te raiti e te pipi, e te puaatoro, etc, i te reira mau fenua, a paruru ai ratou ia tatou atoa nei i te tîtiraa; aita paha o Amerika e navai ei opere atoa na te mau fenua moana.

E no reira a tanu noa i te mau huru maa maoahi ia navai ta tatou maa ia amu, ia ore tatou ia roohia mai i te poia, e ia vaaiihohia te faraoa, e te raiti, e te pipi, e te puaatoro, etc. ei. faaamuraa i te mau nuu faehau o tei manii noa to ratou toto e tia i tatou ia parahi i to tatou mau fenua ma te hau e te peapea ore.

Te oomo nei ratou i to ratou tino i roto i te peho o te mārû pōhe no tatou nei, eiaha tatou ia faaere ia ratou i te maa e au ai, a faaamu râ tatou ia ratou i te mau huru maa e hau i te maitai, a amu ai tatou i te toe mai e te ore e au ia faauta'tu i roto i te mau pahi.

O te farii i teie nei parau faaararaa e e haapao atoa'tu e au ia i te taata e aroha i te hoa o tei faaora ia'na i te enemi taehae ra. O te ore e farii, e taata aroha ore roa ia.

TOAE A MAERE, Faaau Parau, Rue Dumont d'Urville, Orovini, Papeete, Tahiti.
ERNEST C. ROSSITER, Imprimeur, Rue Brea et de la rue Damont d'Urville, Papeete, Tabiti.